

SAILI E AOO E ALA I LE FAATUATUA

Elder David A. Bednar

O Le Korama a Aposetolo e Toasefululua

Saunoaga i Taitai Faalelotu o le CES • 3 Fepuari, 2006 • Jordan Institute of Religion



Ou te faailoa atu lo’u alofa mo outou—ma le agaga faafetai o le Usoga mo la outou ta’āiga amiotonu mo tupulaga talavou a le Ekalesia i le lalolagi atoa. Faafetai atu mo le faamanuia-ina ma le faamalolosia o tupulaga faia’e.

Ou te tatalo ina ia faamanuia ma faamalamalamaina i tatou

e le Agaga Paia a o tatou fefaasoai faatasi i lenei taimi faapitoa.

O Mataupu Faavae Vaavaalua: Tala’i atu i le Agaga ma le Aoo i le Faatuatua

Ua faatele ona apoapoiina i tatou e tusitusiga paia, e folafola atu upumoni o le talalelei e ala i le mana o le Agaga (tagai MFF 50:14). Ou te talitonu o le toatele o i tatou o matua ma faiaoga i le Ekalesia, ua iloa lenei mataupu faavae ma ua taumafai e faaoga. Peitai, e ui ina taua lenei mataupu faavae, ae ua na o se elemene e tasi o se mamanu faaleagaga tele naua. Ua aoaoina soo foi i tatou e saili e aoo e ala i le faatuatua (tagai MFF 88:118). *O le Folafola atu i le agaga ma aoo e ala i le faatuatua*, o mataupu faavae ia e vaavaalua e tatau ona tatou taumafai ia malamalama i ai ma faaoga faatasi ma ia ogatusa lelei.

Ou te manatu ua tatou faamamafaina ma ua tele foi le silafia e uiga i le faiaoga e aoo atu i le Agaga, nai lo le tatou iloa e uiga i se tagata e aoo e ala i le faatuatua. E manino lava, o mataupu faavae ma le faagasologa o le aoo atu ma le aoo mai, e taua i le faaleagaga. Peitai, a o tatou vaavaai atu i le lalolagi o le a tatou ola ai i le lumanai, ua matuai matautia ma fenumiai, ou te talitonu e taua ia i tatou uma lava ona faateleina lo tatou malosi ma le gafatia e saili ai e aoo e ala i le faatuatua. I o tatou lava olaga, i o tatou aiga, ma totonu o le Ekalesia, e mafai ma o le a tatou mauaina faamanuiaga o le malosi faaleagaga, taitaiga, ma le puipuiga pe a tatou saili e ala i le faatuatua ia maua ma faaoga le silafia faaleagaga.

Ua aoaoina i tatou e Nifae, “Pe a tautala atu le tagata i le mana o le Agaga Paia, e moliooina atu [le savali] e le mana o le Agaga Paia i loto o le fanauga a tagata” (2 Nifae 33:1). Faamolemole matau le ala e molioo atu ai e le Agaga le savali i le [loto] ae le o *totonu* o le loto. E mafai e se faiaoga ona faamatala, faaa’oa’o, tauanau, ma molimau atu, ma faia foi ma le atoatoa i le mana tele faaleagaga. Peitai, o le mea moni lava ia, seiloga lava e faataga e le tagata le aano o se savali ma le molimau a le Agaga Paia e ulufale atu ia te ia, ona faatoa tuia ai lea o lona loto.

Uso e ma tuafafine, o le aoo mai e ala i le faatuatua, e tatalaina ai le ala i *totonu* o le loto. O le po nei, o le a tatou taula’i atu i le tiute o i tatou taitoatasi, e saili e aoo e ala i le faatuatua (tagai MFF 88:118). O le a tatou mafaufau foi i le faaogaina o lenei mataupu faavae mo i tatou o ni faiaoga.

O Le Mataupu Faavae o le Faatinoga: Faatuatua i le Alii o Iesu Keriso

Sa faamatala e le Aposetolo o Paulo le faatuatua, o le faalagolago lea i mea ua faamoemoe i ai, o le mautinoa lea o mea e le o vaaia (Eperu 11:1). Na tautino mai foi e Alema, o le faatuatua e le o le mautinoa lea o mea; ae afai ua ia te i tatou le faatuatua, tatou te faamoemoe i mea e le o vaaia, a ua moni ia (Alema 32:21). E le gata i lea, ua tatou aoo mai i *Tautalaga e uiga i le Faatuatua* e faapea, o le faatuatua “o le mataupu faavae muamua i talitonuga faalelotu ua faaalua . . . o le faavae o le amiotonu uma. . . ma o le mataupu faavae foi o faatinoga a tagata atamamai uma.” (Joseph Smith, comp., *Lectures on Faith* [1985], 1).

O nei aoaoga a Paulo ma Alema ma *Tautalaga e uiga i le Faatuatua*, ua faamamafa mai ai ni elemene faavae se tolu o le faatuatua: (1) faatuatua o le *mautinoa* lea o mea e le o vaaia, ma le (2) faatuatua o le *faamaoniga* o mea e le o vaaia, ma le (3) faatuatua o le mataupu faavae o le *faatinoga* a tagata atamamai uma. Ou te faamatalaina nei itutino e tolu o le faatuatua i le Faola, e o lua lava ma le vaai atu i le lumanai, tepa i le taimi ua tuana, ma le amatatia o le faatinoga i le taimi nei.

Faatuatua o le mautinoa lea o mea o loo faamoemoe i ai i le lumanai. O lenei mautinoa o loo faavae i luga o se malamalama sa’o ma sa faalagolago i le Atua, ma mafai ai ona tatou “fetaomi atu i luma” (2 Nifae 31:20) i mea e le o mautinoa ma o le tele lava o taimi, o ni tulaga faigata tele i le galuega a le Faaola. Mo se faaitaiga, na patino le faalagolago o Nifae i lenei mautinoa faaleagaga mo le lumanai, a o ia toe fo’i i Ierusalema e aumai papatusi apamemea—“sa le muai iloa mea [na te] faia. Ae ui i lea, [na ia] alu atu...” (1 Nifae 4:6–7).

O le faatuatua ia Keriso ua nonoa mau ma e afua mai ai le faamoemoe ia Keriso mo lo tatou togiola ma le faaeaga. O le mautinoa foi ma le faamoemoe e mafai ai ona tatou savavali i le taufaasiusiuga o le malamalama ma tau laalaa atu ai i le pogisa—ma le faamoemoe ma le talitonuga e susulu atu le malamalama e faamalamalama ai le ala (tagai Boyd K. Packer, “The Candle of the Lord,” *Ensign*, Jan. 1983, 54). O le tuu-faatasi o le mautinoa ma le faamoemoe, e amatalia ai le faatinoga i le taimi nei.

O le faatuatua o le faamaoniga o mea e le o vaaia, e vaai atu i le taimi ua tuanai ma faamaonia ai lo tatou faalagolago i le Atua ma lo tatou talitonuga i le moni o mea e le o vaaia. Tatou te laa atu i le pogisa faatasi ma le mautinoa ma le faamoemoe, ma tatou te maua foi le molimau ma le faamaoniga a o aumaia le sulu ma maua ai le malamalama tatou te manaomia. O le molimau tatou te mauaina pe a mavae ona tofotofoina lo tatou faatuatua (tagai Eteru 12:6) o le faamaoniga lea e faateleina ma malosi ai lo tatou mautinoa.

O le mautinoa, faatinoga, ma le faamaoniga, e ta’a’ina e le tasi le isi i se faiga faifai pea. O lea faiga e pei o se tā’aiga [coil], ma e oo ina faateleina ma atili ai ona lautele. O nei elemene e tolu o le faatuatua, mautinoa, faatinoga, ma le faamaoniga, e le mavaevae ma tuma’oti; ae e fesootai faatasi ma faifai pea le taamilosaga agai i luga. Ma o le faatuatua e faamuina lenei faiga faifai pea, e atiina ae ma tuputupu ae malie, ma faaliliuina ai. A tatou toe liliu ma faasaga atu i se lumanai e le o mautinoa, o le mautinoa e tau atu ai i le faatinoga ma maua mai ai le faamaoniga, lea e saga faateleina ai le mautinoa. O le a malosi lo tatou faatuatua, i lea upu ma lea upu, o lea fuaiupu ma lea fuaiupu, o sina mea itiiti iinei ma sina mea itiiti iina.

Tatou te mauaina se faaitaiga mamana o le fesootaiga o le mautinoa, faatinoga, ma le faamaoniga a o tauaveina e le fanauga a Isaraelu le atolaau o le Feagaiga i lalo o le taitaiga a Iosua (tagai Iosua 3:7–17).

Manatua ina ua taunuu Isaraelu i le vaitafe o Ioritana ma sa folafola atu ia te i latou o le a vaeluaina le vai, pe “tu foi le vai e pei o se mea maupuepue” (Iosua 3:13), ma o le a mafai ona latou savavali i le elelee matutu. E uiga ese, aua e lei vaeluaina le vai ina ua tutu le fanauga a Isaraelu i auvai o le vai ma faatalitali ai pe tupu se mea; ae, na susu o latou alofivae a o lei vaeluaina le vai. Sa faaalii le faatuatua o Isaraelu ina ua latou savavali i le vai a o lei vaeluaina. Sa latou savavali i le vaitafe o Ioritana ma se mautinoa o le lumanai, i mea ua faamoemoe i ai. A o savavali atu i luma le fanauga a Isaraelu, sa vaeluaina le vai, ma ina ua latou taunuu i le elelee matutu, sa latou toe tepa atu i tua ma sa latou vaaia ai le faamaoniga o mea sa lei vaaia. O lea tala, na avea le faatuatua ma tulaga mautinoa, ma sosoo atu ai ma le faatinoga, ona maua mai ai lea o le faamaoniga o mea e lei vaaia ae moni.

O le faatuatua moni e taulai atu i le Alii o Iesu Keriso, ma e sosoo lava ma le faatinoga. O le faatuatua i le avea ai ma se mataupu faavae o le faatinoga, o loo faamamafa mai i le tele o mau ua tatou masani uma ai.

E faapei o le tino ua oti ia pe a te’a le agaga, e faapea foi le *faatuatua ua mate pe a leai ni galuega* (Iakopo 2:26; ua faaopoopo le faatusilima).

A ia fai outou *ma e anaana i le upu*, a e aua le na ona faalogologo . . . (Iakopo 1:22; ua faaopoopo le faatusilima).

Ae peitai, faauta, afai tou te ala mai, ma fagua o outou mafaufau e oo i le *tofotofo i a’u upu*, ma faa-aoga sina faatuatua itiiti lava. . . . (Alema 32:27).

Ma o le faatuatua i le avea ai ma se mataupu faavae o le faatinoga, e matuai totonugalemu lava i le faagasologa o le aoao ma le faaagaina o upumoni faaleagaga.

Aoao e ala i le Faatuatua: E Filifili mo i Latou Lava Ae Le Galueaiina

E faapefea i le avea ai o le faatuatua ma mataupu faavae o le faatinoga i tagata atamamai uma, ona fesootai ma le aoaoina o le talalelei? A o le a foi le uiga o le saili e aoao e ala i le faatuatua?

I le tulaga aoao o foafoaga uma a le Atua, e i ai mea e filifili mo i latou lava [e faatino] ma mea e galueaiina (tagai 2 Nifae 2:13–14). O i tatou o ni atalii ma ni afafine o lo tatou Tama Faalelagi, ua faamanuiaina i tatou i le mealofa o le saolotoga—o le tulaga gafatia ma le mana o faatinoga tuma’oti. O i tatou o sui ua faaeeina i ai le saolotoga, ma o le mea e aupito taua o

lo tatou galulue e faatino ae le na o le tau galueaiina—aemaise lava a o tatou saili ina ia maua le malamalama faaleagaga ma faaaoga.

O le aoao e ala i le faatuatua ma aafiaga, o vaega tutotonu ia e lua o le fuafuaga a le Tama mo le fiafia. Sa faasaoina e le Faaola le saolotoga mama e ala i le Togiola, ma mafai ai e i tatou ona faatino ma aoao e ala i le faatuatua. O le fouvaleina e Lusifelo o le fuafuaga, na saili ai e faatama'ia le saolotoga o le tagata, ma o lona faamoemoega a'o tatou aoao, ia seiloga lava e tau galueaiina [i tatou].

Manatu i le fesili na tuuina atu e le Tama Faalelagi ia Atamu i le Faatoaga i Etena, "O fea o i ai oe?" (Kenese 3:9). E manino lava na silafia e le Tama le mea sa lafi ai Atamu, peitai, sa fesili lava o Ia. Aisea? Sa faia lava e se Tama potu ma le alofa ina ia mafai e Lona atalii ona faatino e ia lava i le faagasologa o lona aoaoina, ae le faatinoina pe galueaiina e se isi mo ia. Sa le o se tautalaga fai itu-tasi i se atalii e le usitai, lea atonu e mafuli i ai le toatele o i tatou. Nai lo lena, sa fesoasoani le Tama ia Atamu o se tagata o loo aoao, ina ia faatino e ia lava ma faaaoga tatau ai lona saolotoga.

Manatu i le manao o Nifae ina ia iloa mea sa vaai i ai lona tama o Liae i le faaaliga o le laau o le ola. E maeu lava, na amata ona faiaoga le Agaga o le Alii ia Nifae i le faia o fesili nei, "Faauta, se a le mea ua e manao i ai?" (1 Nifae 11: 2). O le mea moni na silafia e le Agaga le mea sa manao i ai Nifae. Ae o le ala le mea na fesili ai? Sa fesoasoani le Agaga Paia ia Nifae e galue i le faatinoga o le aoaoina ae le tau galueaiina. (Ou te fautuaina outou ina ia suesue i se isi taimi ia mataupu e 11–14 i le 1 Nifae ma matau le fesili atu o le Agaga i fesili ma uunaia Nifae e "vaai", o ni elemene ola i le faagasologa o le aoao.)

O nei faataitaiga ua tatou iloa ai, i le avea ai o i tatou ma ni tagata e aoao, e tatau ia te oe ma a'u ona galulue e faatino ma avea ma ē anaana i le upu ae le na ona faalogologo ae tau galueaiina e isi. Pe o oe ma a'u o ni sui, o loo galulue e faatino ma saili e aoao e ala i le faatuatua, pe o tatou faatalitali ea e aoao mai e isi ma faia mo i tatou? Pe o galulue ea tamaiti aoga o loo tatou tautuaina e faatino ma saili e aoao e ala i le faatuatua, pe o latou faatalitali ea tatou te aoaoina atu i latou ma tau galueaiina i latou? Pe o ta uuna'ia ea ma fesoasoani ia i latou o loo tatou tautuaina ina ia saili i le aoao e ala i le faatuatua? O oe ma a'u faatasi ai ma tamaiti o loo tatou faiaoga ai, e tatau ona matua galulue punouai e ole atu, saili, ma tu'itu'itu atu (tagai 3 Nifae 14:7).

O se tagata aoao na te faaaogaina le saolotoga e ala i le galue e faatino e tusa ai ma mataupu faavae sa'o, e tatalaina lona loto i le Agaga Paia—ma valaaulia Ana aoaoga, o le mana molimau, ma molimau faamaonia. O le aoao e ala i le faatuatua e manaomia ona tuu i ai le faaleagaga, o le mafaufau, ma le faaletino ae le tau lava ina talia. O le faamaoni a'ia'i ma le ogatasi o a tatou faatinoga musuia ona o le faatuatua, e faailoa atu ai i lo tatou Tama Faalelagi ma Lona Alo o Iesu Keriso lo tatou naunautai e aoao ma talia faatonuga po o aoaoga mai le Agaga Paia. O le mea lea, o le aoao e ala i le faatuatua e aofia ai le faaaogaina o le saolotoga mama e galue e faatino, ina ua mautinoa o mea ua faamoemoe i ai ma valaaulia le faamaoniga o mea e le o vaia mai le faiaoga moni e toatasi, o le Agaga lea o le Alii.

Manatu i le ala o loo fesoasoani ai faifeautalai i tagata sailiili, ina ia aoao e ala i le faatuatua. O le faia ma tausua o tautinoga faaleagaga, e pei o le suesue ma tatalo e uiga i le Tusi a Mamona, auai i sauniga a le Ekalesia, ma le tausua o poloaiga, e manaomia ai se tagata suesue ina ia faaaoga le faatuatua ma faatino ai. O se tasi o matafaioi taua a se faifeautalai, o le fesoasoani lea i se tagata sailiili e faia ma faamamalu ni tautinoga—e galue e faatino ma aoao e ala i le faatuatua. O le aoao atu, tima'i, ma le faamatala atu, e ui lava ina taua tele, ae e le mafai lava ona avatu ai i se tagata sailiili se molimau i le moni o le talalelei toefuataiina. E na o le faatuatua lava o se tagata sailiili e matua'ia le galue e faatino ma tatala ai le ala i le loto, ma mafai ai e le Agaga Paia ona molioo atu se molimau e faamaonia ai. E tatau lava i faifeautalai ona aoao ia iloa ona aoao atu i le mana o le Agaga. Peitai, e faapena foi ona taua o le tiutetauave o faifeautalai e fesoasoani ai i tagata sailiili ina ia aoao e ala i le faatuatua.

O le aoao lea ou te faamatalaina atu, ua le na o le malamalama i ai i le mafaufau ma teuina ma manatua faamatalaga, ae e manao tele atu i tua. O le ituaiga aoao lea ou te tautala atu ai, e afua ai ona tatou lafoa'i ese le tagata o le lalolagi (tagai Mosaea 3:19), e faaliliu ai o tatou loto (tagai Mosaea 5:2), ma faaliliuina ai i le Atua ma lē toe liliu ese ai lava (tagai Alema 23:6). O le aoao e ala i le agaga e manaomia ai le loto ma le mafaufau matala (MFF 64:34). O le aoao i le faatuatua o le taunuuga lena o le tauaveina e le Agaga Paia o le mana o le upu a le Atua e le gata i le loto ae faapea foi i totonu o le loto. O le aoao e ala i le faatuatua e le mafai ona si'i mai se faiaoga i se tamaitiiti aoga e ala i se

tautalaga, o se ata faataitai, po o se galuega faatino o aafiaga; nai lo lena, e tatau i se tamaitiiti aoga ona faaaoga le faatuatua ma galue ai ina ia maua le malamalama mo ia lava.

Na malamalama lelei lava le taulealea o Iosefa Samita i le uiga o le aoao e ala i le faatuatua. O se tasi o tala aupito lauiloa o le olaga o Iosefa Samita, o lona faitauina lea o fuaiupu e uiga i le tatalo ma le faatuatua i le tusi a Iakopo i le Feagaiga Fou (tagai Iakopo 1:5–6). O lea fuaitau na musuia ai Iosefa e mapu atu i se togavao e latalata ane i lo latou fale, e tatalo ai ma saili atu mo le malamalama faaleagaga. Faamolemole ia matau ia fesili na fatufatua'i e Iosefa i lona mafaufau, ma lagona ai i lona loto—ma na ia aveina ai i le vao. Sa manino lona saunia o ia lava e “ole atu i le faatuatua” (Iakopo1:6) ma galue e faatino.

“O le taulotoaiga o ia taua'iupuga ma le lasi o taofi na ou faapea ifo ai ia te au lava: O le a se mea e ao ina ou faia? O ai o nei lotu uma ua sa'o; po ua sese foi i latou uma? Afai foi ua sa'o se tasi o i latou, o le fea, ma pe faapefea ona ou iloa? . . .

“O le autu o lo'u alu atu ou te fesili i le Alii, ia ou iloa po o le fea o lotu uma ua sa'o, ina ia ou iloa le lotu e ao ina ou auai. O le mea lea, ina ua ou lagona ua tatalaina au ma ua mafai ona tautala atu, sa ou fesili atu loa ia i Laua na tutu mai i ou luga i totonu o le malamalama, po o le fea o lotu uma ua sa'o—ma tatau ona ou auai.” (Iosefa Samita—Talafaasolopito 2:10, 18)

Matau e le'i taulai atu fesili a Iosefa na o se mea na manaomia ona ia iloa, ae pe o le a foi le mea e tatau ona ia fai. O le fesili muamua na taulai atu i le faatinoga ma pe o le a le mea e tatau ona *fai!* O lana tatalo sa na o le faapea: O le fea lotu e sa'o? O lana fesili o le: O le fea lotu e tatau ona ia auai? Sa alu Iosefa i le togavao e aoao e ala i le faatuatua. Sa nauau o ia e faatino.

O le mea taua lava, o le matafaioi e aoao e ala i le faatuatua ma faaaoga upumoni faaleagaga, e i luga o i tatou lava ia taitoatasi. O se matafaioi ua matua faateleina lona taua i le lalolagi lea o loo tatou nonofo ai, faapea foi e o le a ola mai ai. Pe o a, pe faapefea, ma pe o afea foi tatou te aoao ai, e lagolagoina ae le faalagolago i—se faiaoga, se metotia e faaaoga e aoao atu ai, po o se autu patino po o le faiga o se lesona.

E moni, o se tasi o luitau tele i le olaga nei o le saili e aoao i le faatuatua. Ua faia e le Perofeta o Iosefa

Samita se aotelega sili o le faagasologa o le aoao ma ona taunuuga o loo ou taumafai e faamalamalama atu. I se tali atu i se talosaga a Aposetolo e Toasefululua mo ni faatonuga po o aoaoga, sa aoao atu ai e Iosefa: “O le ala sili lava e maua ai upumoni ma le poto e le o le saili atu i tusi, ae ia o i le Atua i le tatalo, ma maua mai ai aoaoga faalelagi” (*History of the Church*, 4:425).

E i ai foi se isi taimi na faamalamalama atu ai e le Perofeta “O le faitau i aafiaga o isi, po o faaaliga na tuuina atu ia te i latou, o le a le mafai ai lava ona tatou maua se vaaiga lautele o le tulaga o tatou i ai ma se sootaga moni i le Atua” (*History of the Church*, 6:50).

O o Tatou Aafiaga o ni Faiaoga

O mea moni e uiga i le aoao i le faatuatua ua tatou talanoaina, e matua tele ai lava ni o tatou aafiaga o ni faiaoga. Se'i o tatou mafaufau faatasi i aafiaga nei e tolu.

Aafiaga 1. O le Agaga Paia ua na o le pau lea o le faiaoga moni.

O le Agaga Paia o le sui lona tolu lea o le Aigaatua, ma o Ia o le faiaoga ma le molimau o mea moni uma. Sa faamatala mai e Elder James E. Talmage:

“O le tofi o le Agaga Paia i Lana galuega i tagata, ua faamatala mai lea i tusitusiga paia. O ia o se faiaoga na auina mai le Tama; ma o i latou uma ua i ai le aia tatau mo Ana aoaoga, o le a Ia faaaliga i ai mea uma e tatau ai mo le siitia o le agaga” (*Mataupu Faavae o le Faatuatua*, 12 ed., [1924], 162).

E ao lava ona tatou manatua i taimi uma, o le Agaga Paia o le faiaoga lea e mafai ona ulufale mai i le loto o se tagata a'oa'o, pe a valaaulia faalelei. E moni, o oe ma a'u ua i ai le matafaioi o le tala'i atu o le talalelei e ala i le Agaga, o le Fesoasoani lava lea, o se tulaga muamua lea e moomia mo le aoao i le faatuatua, lea e na o le Agaga Paia e mafai ona faataunuaina ai (tagai MFF 50:14). O lea tulaga, ua pei ai oe ma a'u o se muia'a tioata lea e faaaoga e gaosi mai ai uaea 'alava malamalama, lea e avatu ai sulu faailoilo i vaega vavamamao naua. E faapei ona tatau i tioata o i totonu o nei uaea ona manino ina ia lelei ona avatu ai le malamalama, e faapena foi ona tatau ai le avea o i tatou ma alāsulu e mafai ona galue atu ai le Agaga o le Alii.

Peitai uso e ma tuafafine, e tatau ona tatou matua faaeteete ina ia manatua i la tatou auunaga, o i tatou o alāsulu ma alāleo; e le o i tatou o le malamalama. “Aua e le o outou e tautala atu ai, a o le Agaga o lo outou Tama e tautala mai ai i totonu ia te outou” (Mataio 10:20). E le o se mea e uiga ia te au, e le o se mea foi e uiga ia te oe. O le mea moni, soo se mea lava e te faia pe ou te faia foi o se faiaoga, ma le iloa ma le faamoemoe e ta’aina atu ai le vaai ia te oe po o a’u lava ia—i savali tatou te tuuina atu, i metotia tatou te faaoga, po o o tatou uiga faaletagata—o se ituaiga lava lena o faitaulaga pepelo ua faasalavei i le lelei o le aoao atu a le Agaga Paia. “Pe na te tala’i atu ea i le Agaga o le upumoni po o se isi ala? Afai foi ua faia i se isi ala e le mai le Atua ia” (MFF 50:17–18).

Aafiaga 2. E sili atu ona lelei ma aoga lo tatou aveai o ni faiaoga, pe a tatou uunaia ma saunia tamaiti e aoao i le faatuatua.

Ua tatou masani uma i le anaga faapea a avatu se i’a i se tagata ona ‘ai ai lea o ia mo le aso e tasi. O le aoao o le tagata e fagota, i se isi itu, o le a maua ana meaai i aso uma o lona ola. I le aveai ai ma faiaoga o le talalelei, tatou te le o galulue e tufatufa atu ni i’a; ae, o la tatou galuega o le fesoasoani atu lea i le tagata e aoao ia iloa “fagota” ma mafai ai ona faalagolago ia te ia lava i le faaleagaga. E sili ona ausia lenei faamoemoe e taua, pe a tatou uunaia ma saunia le au aoga e tusa ai ma mataupu faavae sa’o—a o tatou fesoasoani ia i latou e aoao e ala lea i le faia. “Ai se tasi e fia fai lona finagalo, e iloa ai e ia le mataupu, pe mai le Atua” (Ioane 7:17).

Faamolemole ia matau le faatinoga o lenei aafiaga i le apoapoaiga na tuuina atu e Polika Iaga ia Junius F. Wells, ina ua tofia Brother Wells i le 1875 e faatulaga ia alii talavou o le Ekalesia:

“A fai a outou fonotaga, e tatau ona e amata mai le pito i luga o le lola, ma valaaulia ni tagata se toatele pe a lava le taimi, e fai ni a latou molimau ma a oo i le fonotaga e sosoo ai, ona amata foi lea i le mea na gata ai ma valaaulia isi, ina ia aofia ai tagata uma ma ia faamasani i le tutu i luga e tautala. Atonu e toatele nisi e manatu, e leai ni a latou molimau e tuuina mai, peitai faatutu pea i latou i luga ma o le a faagaganaina lava e le Alii i upumoni e tele latou te lei mafaufau i ai muamua. Ua toatele tagata e maua a latou molimau pe a tutu i luga e taumafai e tuuina atu nai lo le tootutuli ma tatalo mo ni molimau”

(Junius F. Wells, “Historic Sketch of the YMMIA,” *Improvement Era*, June 1925, 715).

Ua tuuina mai foi e Peresitene Boyd K. Packer se fautuaga faapena i o tatou taimi:

“Ma’imau e pe ana mafai ona ou aoao atu ia te outou lenei mataupu faavae e tasi. E maua se molimau i le ta’uina atu! E i ai lava se vaipanoa o lau sailiga mo le malamalama faaleagaga, o loo i ai le “fana’e o le faatuatua,” e pei ona ta’ua ai e le au faitofa. O le taimi lea ua e oo atu ai i le faatausiusiuga o le malamalama, ma laa atu ai i le pogisa, ma iloa ai o loo malamalama le ala i luma atu mo na o se tasi pe lua foi ni laa. ‘O le mafaufau o le tagata’, e pei ona ta’u mai i le mau, e moni lava ‘o le lamepa lea a Ieova.’ (Faataoto 20:27.)

“E ese le maua o se molimau mai mea e te faitauina pe o mea foi sa ta’u mai e se isi; ma o se amataga talafeagai foi lena. E ese foi le faamaonia mai e le Agaga ia te oe i lou loto faapea e moni mea sa e molimau atu ai. Pe le o mafai ea la ona e vaai atu o le a aumaia lava ia te oe a o e faasoa atu? Pe a e foai atu au mea o i ai, o le a i ai foi se mea e sui ai, faatasi ai ma se faapoopoga!” (*Ensign*, Jan. 1983, 54–55).

Ua ou matauina se uiga masani i faiaoga, o e ua tele sa latou ta’uiga i lo’u olaga. Sa latou fesoasoani ia te au ou te saili e aoao i le faatuatua. Sa latou mumusu e ta’u mai ia te a’u ni tali faigofie. O le mea moni, latou te lei ta’u maia lava ia te au ni tali. Ae sa latou faasino mai le ala ma fesoasoani mai i laasaga ou te uia e sue ai a’u lava tali. Ou te lei talisapaia i taimi uma lenei faiga, peitai o aafiaga sa mafai ai ona ou malamalama, o se tali e aumai i se isi tagata e masani lava e le umi se taimi e manatua ai, pe afai foi e manatua. Peitai o se tali tatou te maua e ala i le faaogaina o le faatuatua, e masani lava ona manatua i le olaga atoa. O aoaoga aupito taua o le olaga e pu’e mai—ae le o le aoao mai.

O le malamalama faaleagaga ua faamanuiaina oe ma a’u e maua, ma ua faamaonia le moni i o tatou loto, e le mafai ona foai atu i se isi tagata. E tatau lava ona faia taumafaiga ina ia filiga ma aoao e ala i le faatuatua ina ia maua ai e “oe” lava ia lena malamalama. E na o le pau lea o le auala e mafai ai ona faaliliu atu mea o i le mafaufau, i le loto. E na o le pau lea o le ala, e mafai ai e se tagata ona agai atu i luma ma faalagolago i le malamalama faaleagaga ma le poto masani o isi tagata, ma maua ai na faamanuiaga mo ia lava. E na o le pau lea o le ala e mafai ai ona tatou sauniuni faaleagaga mo mea o le a oo mai. E tatau

ona tatou “saili i le a’oa’o, e faapea foi i le suesue ma le faatuatua” (MFF 88:118).

Aafiaga 3. E faamalosia le faatuatua o le faiaoga a o ia taumafai e fesoasoani i isi ina ia saili e aoao i le faatuatua.

O le Agaga Paia, o le e mafai ona aoao i tatou i mea uma ma faamanatu ia i tatou mea uma, (tagai Ioane 14:26), e naunau o ia e fesoasoani ina ia tatou aoao a o tatou galulue e faatino ma faaoga le faatuatua ia Iesu Keriso. E maeu foi, aua o lenei fesoasoani paia e aoao, atonu e leai se isi mea e sili ona manino mai ai nai lo le taimi tatou te faiaoga ai, a le o le fale po o tofiga faale-Ekalesia. E pei ona faamanino atu e Paulo i tagata Roma, “O oe le aoao atu i le tasi tagata, e te le aoao ea oe ia te oe?” (Roma 2:21).

Faamolemole ia matau fuaiupu nei mai le Mataupu Faavae ma Feagaiga pe faapefea e le aoao atu ma le maelega ona valaaulia le alofa tunoa ma aoaoga mai le lagi.

“Ou te tuuina atu foi ia te *outou* le poloaiga ia *outou* aoao le tasi i le tasi i mataupu o le malo.

“Ia *outou* aoao atu ma le filifiliga ma o lo’u alofa tunoa o le a mafuta ma *outou*, ina ia aoaoina atoatoa lelei *outou* i teori, mataupu autu, mataupu faavae, i le tulafono o le talalelei, ma mea uma lava tau le malo o le Atua, e tatau mo *outou* ona malamalama ai. (MFF 88:77–78; ua faaopoopo le faatusilima)

Mafaufau o faamanuiaga o loo faamatala atu i nei mau, ua faamoemoe patino lava mo le faiaoga: “Aoaogatu . . . ma le filifiliga ma o lo’u alofa tunoa o le a mafuta ma *outou*”—ina ia mafai ai ona aoao oe lena, le faiaoga!

O loo molimauina foi lena lava mataupu i le fuaiupu e 122 mai le vaega lava lena e tasi o le Mataupu Faavae ma Feagaiga:

“Ia tofia mai ia te *outou* lava le faiaoga, ma aua ne’i failauga *uma* faatasi, a ia tuuina atu i tagata taitoatasi e lauga ma ia faalogo *uma* i ana upu, ina ia faamalamalamaina *uma* i lauga a tagata *uma*, ina ia tutusa le avanoa i tagata *uma*. (MFF 88:122; ua faaopoopo le faatusilima)

A lauga pe tautala tagata uma, ma a faalogo tagata uma i se ala mamalu ma le faatulagaina lelei, o le a faamalamalamaina tagata uma. O le faaogaina taitoatasi pe faatasi foi o le faatuatua i le Faaola, e valaaulia ai aoaoga ma le malosi mai le Agaga o le Alii.

Saili e Aoaogatu e ala i le faatuatua: O Se Faaitaiga Lata Mai Nei

Sa faamanuiaina i tatou uma i se lu’i mai le Au Peresitene Sili ia Aokuso talu ai, e faitau le Tusi a Mamona ia oo atu i le faaiuga o le 2005 ua mae’a. Ina ua tuuina mai le lu’i, sa folafola mai e Peresitene Hinckley, o le tausia ma le faamaoni o lenei polokalama faigofie o le faitauina, o le a aumaia ai i o tatou olaga se fuataga faaopoopo o le Agaga o le Alii, o se folafolaga mausali o le a savavali i le usiusitai i Ana poloaiga, ma se molimau malosi atu e uiga i le moni o le i ai o le Alo o le Atua (“O Se Molimau Moni ma Faamaoni,” *Liahona*, Aokuso 2005, 6).

Faamolemole ia matau le avea o lenei lu’i musuia ma faaitaiga masani o le aoao i le faatuatua. Muamua, e lei poloaiina oe ma a’u, pe tauanau, pe manaomia ona tatou faitauina. Ae, na valaaulia i tatou e faaoga lo tatou saolotoga ma galulue e faatino e tusa ai ma mataupu faavae sa’o. O Peresitene Hinckley, o se faiaoga musuia, sa ia fautuaina i tatou e galulue e faatino ae le na o le tau galueaiina. O le taunuuga lava, sa tofu filifili i tatou, pe faapefea ae pe tatou te tali atu foi i le lu’i—ma pe tatou te tumau foi i le faatauina o le galuega.

Lona lua, i le tuuina mai o le valaaulia e faitau ma faatino, sa fautuaina e Peresitene Hinckley i tatou taitoatasi ina ia saili e aoao i le faatuatua. Sa le i toe tufatufaina i tagata o le Ekalesia ni tusi fou e suesue ai, sa leai foi nisi lesona faaopoopo, vasega, po o ni polokalama sa fatuina e le Ekalesia. Sa tofu i tatou ma se kopi o le Tusi a Mamona—ma sa i ai se ala i o tatou loto na matala tele i tua e ala i le faaogaina o lo tatou faatuatua i le Faaola, a o tatou tali atu i le lu’i a le Au Peresitene Sili. O le mea lea, sa tatou saunia ai mo le mauaina o aoaoga mai le faiaoga moni e toatasi, o le Agaga Paia lea.

I ni vaiaso na mavae atu nei, sa matuai faagaetiaina lava a’u i molimau a le anoanoai o tagata o le au paia i o latou aafiaga talu ai nei i le faitauina o le Tusi a Mamona. Sa aoaoina ai ni lesona faaleagaga talafeagai lelei, ua suia ai olaga mo le lelei, ma ua mauaina foi faamanuiaga sa folafolaina mai. O le Tusi a Mamona, o se loto naunautai, ma le Agaga Paia—e matuai faigofie lava. Ua faamalosia lo’u faatuatua ma le faatuatua o isi o le Usoga a o matou tali atu i le valaaulia a Peresitene Hinckley, ma a o matou matauina foi le anoanoa’i o *outou* o galulue ma aoao i le faatuatua.

E pei ona ou ta'u atu muamua, o le matafaioi e saili e aoao i le faatuatua, e i luga lava o i tatou taitoatasi, ma o le a faateleina le taua o lenei matafaioi a o aga atu foi ina faateleina le fenumia'i ma le faaletonu o le lalolagi o loo tatou ola ai. E taua le aoao i le faatuatua mo lo tatou atinaega faaleagaga patino ma le tuputupu ae o le Ekalesia i nei aso amuli. Talosia ia tofu fia feinu moni i tatou taitoatasi i le amiotonu ma ia faatumulia i le Agaga Paia (tagai 3 Nifae 12:6)—ina ia tatou saili ai e aoao i le faatuatua.

Ou te molimau atu o Iesu o le Keriso, le Alo Pele e Toatasi o le Tama e Faavavau. O Ia o lo tatou Faaola ma le Togiola. Ou te tautino atu a tatou aoao ia te Ia,

ma faalogo i Ana upu, ma savavali i le agamalu o Lona Agaga (tagai MFF 19:23), o le a faamanuiaina i tatou i le malosi faaleagaga, puipuiga, ma le filemu.

I le avea ai o au ma se auauna a le Alii, ou te talosaina lenei faamanuiaga i o outou luga taitoatasi: ia faateleina ma faaleleia atili lo outou naunautai ma le mana e saili ai e aoao i le faatuatua—ma ia fesoa-soani lelei atu ai i isi ina ia saili e aoao i le faatuatua. O lenei faamanuiaga o le a avea ma se puna o oa sili o le malamalama faaleagaga i lou lava olaga, o lou aiga, ma i latou e te faiaoga ai ma tautuaina. I le suafa paia o Iesu Keriso, amene.